

COMUNICATO n. 1795 del 05/07/2024

Fenida su con sodisfazion la didatica di prumes 6 meisc del an. Anter la novitèdes per l istà conzerc, esposizions e laboratories.

Museo Ladin de Fascia, n bilanz de la ativitèdes didatiches e la novitèdes per l istà

[Ladino] Se à serà su con sodisfazion l'atività didatica che l Museo Ladin de Fascia à portà dant te la pruma pèrt del 2024 tras sie Servijes educatives. La ativitèdes se à dejout per la maor pèrt te Museo Ladin, na pèrt sul teritorie e na pèrt te la senta de la mostra “1914-1918 - La Gran Vera – La Grande Guerra: Galizia-Dolomiti” de Moena, dalajà che chest an vegn recordà apontin i 10 egn de la mostra.

La ativitèdes didatiches del Museo Ladin les é states sportes anter i meisc de jené e jugn a 1.058 persones compagnèdes da 124 insegnanc e insegnantes. I percorsc porté dant i é stac 14 e i à tocià argomenc desvalives leé a tempes del an, desche l Carnascèr e l temp de Pèscà, o a la tradizions ladines, enschin a la cognoscenza de la speisa da zacan. Fata la sumèda de la pruma pèrt del an, l Museo vèrda inant al istà tanche pontà via tras la esperienzes metudes a jir per i ghes: se trata de “Giramuseo” vigni lunesc, de la vijita vidèda te Museo de mèrtesc e de “Caccia alla traccia” de mercol.

Col prum de messèl à endò vert ence duta la sezions sul teritorie del Museo Ladin - L Molin e L Malghier a Pera, L Stont a Ciampedel, L Segat a Poza e La Sia a Penia - che les ge dèsc l met a la jent de entener amò miec coche se vivea te Fascia enschin al centené passà.

Amò apede, via per dut istà e enschin ai 8 de setember te senta del Museo l é pervedù na proponeta de valuta: la mostra de fotografies del fotograf fascian Franz Dantone Pascalin, un di prumes fotografes de la Dolomites, realisèda de gra al lurier fat ensema dal joen patron de la fotos, Lorenzo Dezulian, dal Istitut Ladin de Fascia, da la Fondazion Dolomites Unesco e dal fotograf Davide Baldrati.

En cont de la ativitèdes didatiches, la maor pèrt de la 1.058 presenzes la é raprejentèda dai 624 studenc de la Scola ladina de Fascia, per chi che i percorsc é stac porté dant per ladin, dapodò da 120 studenc e studentes da de altra scoles da foradecà, privates o equiparèdes e da passa 200 persones che les é jites do ativitèdes personalisèdes o giornèdes de formazion, desche compagnadores de mesa mont o jent grana di corsc de ladin. Dut chest l é sessaben n toch emportant del lurier che l Istitut fèsc per ge jir do a so zil, che l é apontin chel de portèr pro a slarièr fora la cognoscenza de la istoria, ma ence de tradizion e usanzas del popul ladin, tras na bela colaborazion co la scola e la sociazions.

Chest an l Istitut Cultural Ladin de Fascia, dessema a la sociazion “Sul fronte dei ricordi” e al Comun de Moena, col sostegn de la Region Trentin-Südtirol, de l'Apt de Fascia e del Comun General de Fascia, à recordà apontin i 10 egn de la mostra “La Gran Vera / La Grande Guerra” e i 110 egn de istoria passé dal scomenz de chest aveniment rie e pesoch per la nazions e la popolazions toutes ite. Per chest l percors à pervedù ence scontrèdes con esperc pissèdes apontin per i studenc e la studentes del ultim an de la scola mesèna de la val. I studenc à podù scutèr su informazions enteressantes da la ousc ferèda del curator onorarie de la Mostra, Michele Simonetti Federspiel, jan do i fac de n tous e de na tousa da Moena che à

vivù tel temp de la Pruma Vera. Dapodò i à podù tor pèrt a vijites treatralisèdes portèdes dant con pascion e braura da Ilaria Chiocchetti e David Dorich, da cheles che i à podù se emprevaler per lurèr fora dessegnes e slogan che ades se pel veder metui fora te pos significatives te duta la val.

Col prum de messèl 2024 pea via endodanef la ativitèdes da d'istà del Museo. La giornèda de lunesc la é dedichèda a “Giramuseo”, n bel percors fora per la sales espositives pissà apontin per la families. Via per la giornèda, ti oraries de museo, bec e genitores pel ge jir do a la indicazions de n libret da colores che, trè jèghes e conties, ge dèsc l met de fèr dessema n bel viac a la descorida de la jent e de la cultura ladina... e a la fin, se dut carenea, l é ence n pest! La seconda atività l é la classica vijita vidèda al Museo, che no la pel mencièr te la proponetes ai ghes. En ultima, chest an i Servijes educatives del Museo à lurà fora na atività spezièla per bec e bezes da 8 a 12 egn aló da la mostra La Gran Vera ja Moena: “Caccia alla traccia” la mena i bec a cognoscer desvalives aspec de la Gran Vera te noscia val, a na vida adatèda a l'età joena di partezipanc.

Per fenir la proponetes da d'istà, l Museo ge sporc a si ghes la mostra “Franz Dantone. Fotograf de la Dolomites” che raprejenta n gran melaur per la Val de Fascia e la valorisea l lurier de Franz Dantone Pascalín, l prum forograf fascian, nasciù ta Ciancei del 1839. De gra a sie lurier pascionà e a la realizazion de passa mile foti de gran calità, Pascalín à portà pro a la definizion del imaginarie coletif che à permetù de scriver ite la Dolomites te la lingia del Patrimoine Mondiel. La esposizion la è fata de 74 fotos, na pèrt originèles da enlouta e na pèrt stampèdes a butèda de inchioster da reproduzions digitèles otegnudes da la lèstes de vierech restaurèdes anchecondì.

De outra informazions, dates e oraries sun: <https://www.istladin.net/it/>

(pc)